

hvenær matið fer fram, og gefa þeim kost á að koma að gögnum og upplýsingum um matsatriði.

Að matinu loknu skulu þeir gera um það skriflega skýrslu, sem þeir mega vera reiðubúnir að staðfesta með eiði sínum fyrir rétti, ef krafist verður.

Matinu skal hraðað.

Þriðjudaginn 15. febrúar 1977.

Nr. 243/1976. **Veiðifélag Borgarfjarðar**

gegn

Benjamín Ólafssyni

Guðmundi Bjarnasyni og

Sveini Bjarnasyni.

Kærumál. Dómkvaðning matsmanna samkvæmt lögum nr. 76/1970 úr gildi felld.

Dómur Hæstaréttar.

Kærumál þetta dæma hæstaréttardómararnir Magnús Þ. Torfason, Benedikt Sigurjónsson og Logi Einarsson.

Ásgeir Pétursson, sýslumaður í Mýra- og Borgarfjarðarsýslu, hefur framkvæmt hina kærðu dómkvaðningu.

Með kærú 5. nóvember 1976, sem barst Hæstarétti 14. desember 1976, hefur sóknaraðili kært dómkvaðningu undir matsmanna til að meta varnaraðiljum bætur vegna skertrar veiðiaðstöðu í Hvítá árin 1970—1973, sbr. XV. kafla laga nr. 76/1970. Dómkvaðningin var framkvæmd að beiðni varnaraðilja og fór fram á aukadómþingi Mýra- og Borgarfjarðarsýslu 3. febrúar 1976. Sóknaraðili virðist eigi hafa fengið vitneskju um dómkvaðninguna fyrr en 26. október 1976. Hann krefst þess, að dómkvaðningin verði ómerkt, en kærumálskostnaður verði látinn falla niður.

Héraðsdómari tilkynnti varnaraðiljum um kærú máls þessa

með bréfi 14. janúar 1977. Frá þeim hafa hvorki borist kröfur né greinargerð.

Sóknaraðili er samband veiðifélaga í Mýra- og Borgarfjarðarsýslu og málsvari þeirra út á við, sbr. 3. gr. og 4. gr. samþykktar nr. 101/1975. Matsmenn kvöddu fulltrúa veiðifélaganna til fundar 26. október 1976 og skýrðu þeim frá dómkvaðningunni. Með vísan til þessa svo og með hliðsjón af niðurlagsákvæði 3. tl. 95. gr. laga nr. 76/1970 varðar dómkvaðningin sóknaraðilja með þeim hætti, að honum er heimil kæra máls þessa.

Í matsbeiðni var eigi skilmerkilega greint, að hverjum matsbeiðendur hygðust beina þeim kröfum um skaðabætur, sem meta átti. Bar héraðsdómara að inna matsbeiðendur nánar eftir því. Að því búnu átti hann, eins og atvikum máls þessa er háttað, að gera matsbeiðendum og matsþola viðvart, áður en dómkvaðning færi fram, svo að þeir gætu lýst viðhorfi sínu til hennar, sbr. 3. mgr. 139. gr. laga nr. 85/1936, sem hér á við eftir undirstöðurökum sínum. Héraðsdómari hefur ekki gætt þess að láta málið sæta slíkri meðferð. Verður því að ómerkja hina kærðu dómkvaðningu.

Kærumálskostnaður verður ekki dæmdur.

D ó m s o r ð :

Hin kærða dómkvaðning er úr gildi felld.

Dómkvaðning matsmanna á aukadómþingi Mýra- og

Borgarfjarðarsýslu 3. febrúar 1976.

Ár 1976, þriðjudaginn 3. febrúar, var aukadómþing Mýra- og Borgarfjarðarsýslu sett í skrifstofu dómsins í Borgarnesi og haldið af Ásgeiri Péturssyni sýslumanni með undirrituðum vottum.

Fyrir var tekið: Að dómkveðja matsmenn skv. XV. kafla laga um lax- og silungsveiði til þess að meta bætur vegna skertrar veiðiaðstöðu í Hvítá fyrir landi jarðanna Holts og Brennistaða í Borgarhreppi.

Dómarinn leggur fram nr. 1 beiðni um að dómkveðja menn til þess að meta til peningaverðs bætur fyrir skerta veiðiaðstöðu í Hvítá í Borgarfirði fyrir landi jarðanna Holts og Brennistaða, upplestin, svohljóðandi:

„Holti 26. apríl 1974.

Við undirritaðir, Benjamín Ólafsson, Holti, Borgarhreppi, Sveinn Bjarnason og Guðmundur Bjarnason, Brennistöðum, Borgarhreppi, óskum eftir því við sýslumann Mýra- og Borgarfjarðarsýslu, að hann skipi mann eða semji sjálfur við okkur um veiðibætur fyrir árin 1970—1973 að báðum meðtöldum. Ef ekki semst um bæturnar, þá óskum við eftir, að hann dómkveði menn í undirmat skv. lögum um lax- og silungsveiði, og vísast málið þá þangað.

Virðingarfyllst,

Benjamín Ólafsson

Sveinn Bjarnason

Guðmundur Bjarnason.

Til sýslumanns Mýra- og Borgarfjarðarsýslu“.

Nr. 1. Lagt fram í aukadómþingi Mýra- og Borgarfjarðarsýslu 3/2 1976. Ásgeir Pétursson.

Til þess að framkvæma hið umbeðna mat, að meta bætur til handa eigendum og ábúendum jarðanna Holts og Brennistaða, þeim Benjamín Ólafssyni, Sveini Bjarnasyni og Guðmundi Bjarnasyni, vegna skertrar veiðiaðstöðu í Hvítá árin 1970—1973, að báðum meðtöldum, sbr. 15. kafla laga nr. 76/1970 um lax- og silungsveiði, eru dómkvaddir sem þar til hæfir og óvilhallir menn þeir Jón Magnússon sýslufulltrúi, Stykkishólmi, og Hinrik A. Þórðarson, fyrrv. bóndi, Nóatúni 18, Reykjavík.

Hinir dómkvöddu matsmenn skulu framkvæma matið af alúð og samviskusemi og óhlutdrægni í hvívetna og eftir bestu þekkingu og vitund. Þeir skulu tilkynna öllum viðkomandi aðiljum, sem skv. 95. gr. laga nr. 76/1970, sbr. 94. og 96. gr. laganna, kynnu að verða taldir bótaskyldir, hvar og hvenær matið fer fram og gefa þeim kost á að koma að gögnum og upplýsingum um matsatriði.

Að matinu loknu skulu þeir gera um það skriflega skýrslu, sem þeir mega vera reiðubúnir að staðfesta með eiði sínum fyrir rétti, ef krafist verður.

Matinu skal hraðað.